

Jon-ate kaapiya tu yuuh

¹“O vêêh haale bop^b sen Anutu yoo holin hong-ato, ham o noom-aso, sa yêêv sa kaavu kaapiyaa-jo laas vu ham sen sahengg naving ham keen-ato. Le me-soo timu le, nganjo hil pin sen lalak vakasin keen anii-to ond sil ahend naving ham having, ²in vakasin keen neep hôôk yalonggpayo tombe le nanjip gaving yiyi-ambe nanjip danggata.

³Aamangg Anutu yuuh Noow Yesu Kalisi le lambiing-ambe yuuhate samu osin ka pasiv naam mando gaving yiyi-ambe yalonggpayo nanjip melass, tombe yiyi mando lak vakasin keen osin ahe havingin.

Yahengg gaving yiyi-ande yiyi ganggin yiyi in vakasin tatuhin

⁴“Sahengg anivasa lôôt in saahe de noom-aso vaalu dando osin vakasin keen lohvu tanasin sen Aamangg nêêl vu yiyi-ato. ⁵^dOm gêên sa naanêêl vu hong naambe yahengg gaving yiyi. Sa kaavu tanasin-anjo vu hong ond me-nambe tanasin moos ti le, nganjo tanasin timu sen yiyi oo hango vu bôôy nyendoos-ato. ⁶^eDe yahengg havingin-anjo nambe yiyi samu Anutu-te tanasin, tonde yite tanasin-anja ond yik nambe sen ham hango vu bôôy nyendoos-ato nambe ham mando osin ahe havingin.

⁷^fHil tatuhin vaha-so ngeeyaata lala lalohvu taaku pin. Hil-anju me-danêêl nambe Yesu Kalisi tu omaahonôôn keen e, om hil nambêênju ond sil tatuhin vaha-so osin sil hil sen dayiis ngaamong vu Kalisii-to. ⁸Om ham ganggin ham in nambe kul sen hey aawiing-ambe nôôn ak vu ham-ato ond ham-ame gavuuu e, in ham e gako nyevahaan anivasa osin doos. ⁹^gIn hil pin sen me-danêêl tanasin lohvu Kalisi-te tanasin e, de yoo danêêl tanasin vaalu savok la, ond sil-ame silate Anutu le. Nganjo hil sen danêêl tanasin lohvu Kalisi-te tanasin-ato, ond mem Aamangg Anutu yuuh Noow dando having sil. ¹⁰^hOm naambe omaaho ti naas vu ham in nambe naanêêl tanasin, le me-nêêl lohvu Kalisi-te tanasin e, ond ham-ame gako jakana hamate bayêên e, de ham-ame bakaas vu le, ¹¹in

^a 1:1 1Pi 5:1; 3Jon 1 ^b 2; Jon 1 Vakasin sen Jon kaavu be nêêl nambe vêêh-ato ond manyinjo hil vaalu kand navu nambe vêêh keen, tonde hil vaalu kand navu nambe nêêl vakasin pakwesin lak hil bel-ate lu ti vu Esia. ^c 1:4 3; Jon 3 ^d 1:5 1; Jon 2:7; 3:11
^e 1:6 1; Jon 5:3 ^f 1:7 1; Jon 4:1-3 ^g 1:9 1; Jon 2:23 ^h 1:10 Ep 5:11; 2Tes 3:6

omaaho sen bakaas nivasa vu yii-to, ond lohvu nahôôvu yi in kul anipaya sen nawiing-ato.

¹² ⁱVakasin ngeeyaata neep in nambe sa kaavu naas vu ham-ato, le ma de sa nimbaya nambe same kaavu hôôk kaapiya le, in sa kangg monavu nambe sale anaas vu ham-ambe yiy oo bakaas, ond mem yale yahengg anivasa keen.

¹³ Halimaavêh^j sen Anutu yoo holin yii-to noondin-aso kand navu hong. Yik vakasin lung laa-ja.

ⁱ 1:12 3Jon 13-14 ^j 2Jon 13 Jon nêêl halivêêh-anjo ond yik hilin vakasin lak Kalisi-te hil alu ango sen sil ahondoosin yi dandôô-to, tonde noondin-aso ond nanêêl lak sil having yi.